

■ GLOSSA

Drogaziun federala

DA FLURIN SPESCHA

Il s plevons sursilvans han bain vesi endretg, cura ch'els han vesi enten leger il mandat da rogaziun da la Regenza grischuna ch'i sa tractava qua d'in veritabel engion d'etichetta. Sut il pretext da la Rogaziun federala ha il stadi empruvà en moda subtilissima d'intoxicar la dignitad ecclesiastica. Las consequenzas fissan stadas fatalas. Ins avess prendì la ristga ch'ina gronda part da las cartentas e dals cartents fiss crudada giu dal tschep – enivrada d'ina tschantscha giu da chanzla ch'avess provocà ina tossicomania generala.

En la chasa da Dieu – nua che regia pli ch'insanua auter il dictum: quod scripsi scripsi – na dastgan vocals e consonants mai vegnir transsubstantziads senza che Ruma haja in pled en il chapitel.

Qua ha la Regenza agì en moda dal

tuttafatg irresponsabla. Ins mo s'imagineschia co ch'il cumin da cartents fiss sorti da la baselgia quel di da la Rogaziun federala. Cun in viriveri fo-noenigmatic tranter las ureglias ch'i mo avess bugli da la lavada.

La dependenza fiss stada perfetga. Il pled statal giu da la scantschala avess manà ad ina desorientaziun totala. Anc mai n'avessan ils cristifidaivels dudi en baselgia ina tala verva – e nagliur dador baselgia na l'avessan els pli chattada – ni en ils cudeschs da lur poets, ni en las cartas da menu da lur ustarias, ni en il radio, ni en scola.

La dependenza fiss stada integrala. E la Regenza – gia daditg sin il precinct da la liberalisaziun sfranada – avess finalmain gi in motiv per distribuir a l'engronda e sin basa legala la droga tranter tut quels ch'eran vegnids infixads cun ella a chaschun da la Rogaziun federala.

Ch'ina tala droga attatga sco emprim il tsharvè sa oramai era mes bov. Il center linguistic da giuven e vegl vegn immediat absorbi da la sostanza nuschaivla. Ins avess en curt temp vesi per las streglias e giassas sursilvanas da quels che fissan currids sco follidiots suenter in pèr grams «metatesa», «monotong» u «negaziun dubla» – per menziunar mo las pli destructivas.

Ed il stadi avess gi tutta bregia d'integrar tut quels malspiertads en in program statal da distribuziun d'alluzinogens ed auters tissis.

«Giuvens e vegl – senza drogas», han ditg ils plevons sursilvans cun persuasiun cardinalica ed han qua tras preservà la Surselva d'ina inundaziun ch'avess najentà giuven e vegl en il diluvi d'ina babilonia maivesida – decretada si da Cuira cun in attest dal medi.

Dieus saja rugà!